

四庫全書

集部

欽定四庫全書

集部

端明集卷二

詳校官庶吉士臣朱理

檢討臣何思鈞覆勘

總校官進士臣朱鈐

校對官中書臣劉國南

謄錄監生臣周元濬

欽定四庫全書

集部三

端明集

別集類二 宋

提要

臣等謹案端明集四十卷宋蔡襄撰襄
字君謨仙遊人天聖八年舉進士甲科官至
端明殿學士知杭州徙南京留守未及行以
憂歸越歲卒於家乾道中追謚忠惠事迹具
宋史本傳宋史藝文志載襄集六十卷奏議

十卷文獻通考則作十七卷多寡懸殊不應如是疑通考以奏議十卷合於集六十卷總為七十卷而傳刻訛舛倒其文為十七也然其初本世不甚傳乾道四年王十朋出知泉州已求其本而不得後屬知興化軍鍾離松訪得其書重編為三十六卷與教授蔣邕校正鋟板乃復行于世陳振孫書錄解題惟載十朋三十六卷之本與史不符蓋以此也元

代板復散佚明人皆未覩全帙閩謝肇淛嘗
從葉向高入秘閣檢尋亦僅有目而無書萬
厯中莆田盧廷選始得鈔本於豫章俞氏於
是御史陳一元刻於南昌析為四十卷興化
府知府蔡善繼復刻于郡署仍為三十六卷
而附以徐勵所輯別記十卷然盧本錯雜少
緒陳蔡二本均未及銓次後其里人宋珏重
為編定而不及全刻僅刻其詩集以行雍正

甲寅袁喬孫廷魁又裒次重刻是為今本觀
十朋序稱所編凡古律詩三百七十首奏議
六十四首雜文五百八十四首則已合奏議
於集中又稱嘗於張唐英仁英政要見所作
四賢一不肖詩而集中不載乃補置於卷首
又稱奏議之切直舊所不載者并編之則十
朋頗有所增益已非初本之舊今本不以四
賢一不肖詩弁首又非十朋之舊矣乾隆四

十六年十一月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

提要

端明集序

文以氣為主非天下之剛者莫能之古今能文之士非不多而能傑然自名於世者亡幾非文不足也無剛氣以主之也孟子以浩然充塞天地之氣而發為七篇仁義之書韓子以忠犯逆鱗勇叱三軍之氣而發為日光玉潔表裏六經之文故孟子闢楊墨之功不在禹下而韓子觝排異端攘斥佛老之功又不在孟子下皆氣使之然也若二子者非天下之至剛者歟國朝四葉文章

尤盛歐陽文忠公徂徠先生石守道河南尹公師魯甫
田蔡公君謨皆所謂傑然者文忠之文追配韓子其剛
氣所激尤見於責高司諫書徂徠之氣則見於慶厯聖
德頌師魯則見於願與范文正同貶之書君謨則見於
四賢一不肖詩嗚呼使四君子者生於吾夫子時則必
無未見剛之嘆而乃同出於吾仁祖治平醇厚之世何
其盛歟夫以臺諫之風采朝士莫不畏其筆端自侍從而
下奔走伺候其門者紛然也文正鄙陽之貶余尹歐既

與之同罪矣蔡公乃於四賢相繼黜謫之後形於歌詩而斥為不肖羞其見縉紳之面而辱甚市朝之撻則公之剛又可知也十朋初見其詩於張唐英所撰仁英政要甚歆慕之其後見公文集乃沒而不載竊以為恨乾道四年冬得郡溫陵道出莆田望公故居裴回顧歎而不忍去入境訪公遺迹則首見所謂萬安橋者與大書深刻之記爭雄且深惜其有濟川之才而不至於大用登愛松堂九日山則又見公之詩與其真蹟猶在凜然

有生意如見其正顏色坐黃堂時也蓋公至和嘉祐間
嘗兩守是郡至今衆人稱太守之賢者必以公為首求
其遺文則郡與學皆無之可謂缺典矣於是移書興化
守鍾離君松傳君自得訪於故家而得其善本教授蔣
君雖與公同邑而深慕其為人手校正之鋟板於郡庠
得古律詩三百七十首奏議六十四首雜文五百八十
四首而以四賢一不肖詩置諸卷首與奏議之切直舊
所不載者悉編之比它集為最全且屬予序之予曰端

明公文章文忠公嘗稱其清遒粹美後雖有善文辭好
議論者莫能改是評也予復何云然竊謂文以氣為主
而公之詩文實出於氣之剛入則為謬誇之臣出則為
神明之政無非是氣之所寓學之者宜先涵養吾胸中
之浩然則發而為文章事業庶幾無媿於公云五年十
月永嘉王十朋序

欽定四庫全書

瑞明集卷一

古詩

親祀南郊詩

有序

宋 蔡襄 撰

臣裏言伏觀皇帝陛下親執牲玉以饗上帝酌定大
樂登南三聖天地清寧神祇歡格陛下齋精至誠著
見兩間臣叨從法駕躬親禮文之盛職在詞掖不敢

以虛陋自棄謹撰成親祀南郊四言古詩一章凡一百七十六句雖不足以道誦德業之光然略掇大要垂傳遐域亦愚臣惓惓之至其詩曰

天畀元統赤運開社聖祖神宗海域平砥思皇真考嶽封汾祀餌係邊陲包束戈矢丕顯靈德光被萬里民壽而康恩及蕭葦恭惟皇帝繼文之始兢兢日慎夙夜勤只哀憐困窮有如在已惟刑是卹弗繇怒喜躬服儉約黜棄浮侈罔有逸欲曰惟三紀大中則經興亡則史陰

陽時序日緯躔軌樂律本原禮法根柢兵韜術數萬微
精旨該通變貫咸燭厥理歲舍壬午盜發南鄙帝曰汝
青治辦行李毋大誅割定患則已獵獵靈旗啓道徑指
兇渠陪仆俘徒授耳嶺服既平勲賞周被封歿錄孥門
戶有歸粵茲明年農家豐美廬廬積腐庾漕儲峙帝咨
相臣匪台德爾穹昊眷賚祖考佑俾何施不報將祀郊
時號令四下若建瓴水荒服述職奔走輸委仲冬丙寅
齋寢以俟先時霾晦颺籟號起真意益莊降鑒伊邇夜

漏適中星露雲靡大輅既馭清陽出晷休光無垠令容
有偉爰翊殊庭奠享仙機高靈委蛇元氣旭卉陰施自
遠大功績似擁格純禧益厚丕址八宿廟下月魄初朏
龍章采藻瓚爵擎跪拜于禰宮慈顏僅咫尺至誠馨香甘
薦滫瀡哀念劬勞譬瞻岵岵濯淚霑珪將遂復止京都
之南崇丘迤邐飛螭躡塵法乘徐柅地環帝幄霄揭隅
雉警角飄蕭穀騎連累言降言陟實惟告已燭錯宵明
壇圻空紫交佩陸離庶旄颯纚樂變神格列周甲癸三

后咸在上蒼臨視皇皇富媼從執籩簋七精閃忽五鎮
瑰瑋星官下翔濟祗騰時等級卑高食飲噓哆欣散告
言奏福來底更御步輦夾途軍壘鉦鼓驚轟跳呼牛鬼
異域窮陬黃髮稚齒動蕩成波謹喧成市端聞停午玉
色尚宸赦澤春行幽加蟄蟻廢滯振拔垢瑕刷洗寬貸
賦取削減逋詭皇帝慈孝下民胥擬皇帝恩仁四國傾
倚皇帝曰咨羣公卿士舜隆聯變商圯朋誣孰忠于是
孰讒予匪入官多門孰予室弭蓄兵過制孰予究揣百

姓窘窮其患孰弛外夷狙驕其強孰箠驅人以法曾莫
如恥化民成俗曾莫如禮百官勅業相予表裏登任俊
良剋片姦宄天錫帝年萬有億秭天錫聖嗣詵詵衆子
乾剛不息章明度揆無彊惟民惟帝其侍臣襄詠歌直
道是履

詔答

勅蔡襄省所進親祀南郊古詩事具悉朕惟王者之禮
莫重於郊謂怠於事天不可以訓是故憲章周式恭講

漢儀序惟仲冬始因陽氣之達卜以南至躬即園丘之
崇爰升燎以致誠乃推恩而均貺卿學窮雅興詞摘藻
絢慶元吉之祚美盛事之成啓癸英辭鋪昭景鏘溫麗
盡一時之妙適逸得備善之長覽翫載周歎尚無已故
茲獎諭卿宜悉知

御筆賜字詩

并序

臣襄伏蒙皇帝陛下特降中使賜臣御書一軸其文
曰御筆賜字君謨者臣孤賤遠人無大材藝陛下親

灑宸翰推著經義俾臣佩誦以盡謨謀之道事高前
古思出非常臣感懼以還謹撰成古詩一首以敘遭遇
干冒聖慈臣無任荷戴兢營之至

皇華使者臨清晨手開寶軸香煤新沿名與字發深旨
宸毫灑落奎鉤文精神高遠照日月勢力雄健生風雲
泯然氣質不可寫乃知學到非天真緘藏自語價希代
誰顧四壁嗟空貧臣聞帝舜優聖域臯陶大禹為其鄰
吁俞敕戒成典要垂覆後世如穹旻陛下仁明如舜禹

豪英進用司鴻鈞臣襄材智最駕下豈有志業通經綸
獨是丹誠抱忠樸常欲贊奏上古珍又聞孔子春秋法
片言褒貶賢愚分考經內省不自稱但思至理書諸紳
乾坤大施入洪化將圖報効無緣因誓心願竭謨謀義
庶裨萬一唐虞君

詔答

勅蔡襄省所進古詩一首為蒙特遣中使賜御書一軸
其文曰御筆賜字君謨者事具悉朕常日罷朝閒燕多

以經史書藝時用頤神因見唐高宗賜戴郝李崔四臣之字旨義皆有所誨諭卿詞令根于溫厚筆力極于深妙名以本其所贊字以申其所輔偶御毫而拔翰俾中璫而特錫良以將厚意而表殊寵也數陳謝懇發為詩文遵臯陶之言以懋其稽古述帝舜之事以思其底績宣明順美重增嘉歎故茲獎諭卿宜知悉

四賢一不肖詩

中朝鸞鶴何儀儀慷慨大體能者誰之人起家用儒業

馳騁古今無所遺當年得從諫官列天庭一露胷中奇
天身受責甘如薺沃然華實相歲稔漢文不見賈生久
詔書曉落東南涯歸來俯首文石陛尹以京兆天子毘
名都翼翼郡國首里區百萬多占辭豪宗貴倖矜意氣
半言主者承其願昂昂孤立中不倚傳經決訟無牽羈
老姦黠吏束其手衆口和附歌且怡日朝黃幄邇天門
帝前大畫當今宜文陳疏舉時密啓此語多祕世莫知
傳者籍籍十得一一者已足為良醫一麾出守番君國

金定四庫全書
卷一
惜此智慮無所施吾君睿明廣視聽四招邦俊隆邦基
廷臣諫列復鉗口安得長喙號丹墀晝歌夕寢心如疚
咄哉汝憂非汝為

右范希文

南方之強君子居卓然安道襟韻孤詞科判等屢得雋
呀然鼓焰天地壚三年待詔處京邑斗粟不足榮妻孥
耳聞心慮朝家事螭頭北奏帝曰都校書計課當序進
麗賦集仙來顯塗詰墨未乾尋已奪不奪不為君子儒

前日希文坐言事手提勅教東南趨希文鯁亮素少與
失勢誰復能相扶嶄然安道生頭角氣虹萬丈橫天衢
臣靖胷中有屈語舉嗌不避蕭斧誅使臣仲淹在庭列
日獻陛下以嘉謨刺史榮官雖重寄奈何一郡卷不舒
言非由位固當罪隨漕扁舟盡室俱災陬此去數千里
橐中狼籍惟蠹書高冠長佩叢闕下千百其羣訶爾愚
吾知萬世更萬世凜凜英風激懦夫

右余安道

君子道合久以成小人利合久以傾世道下衰交以利
遂使周雅稱嚶鳴煌煌大都足軒冕綽有風采為名卿
高名重位蓋當世退朝歸舍賓已盈脅肩諂笑不知病
指天報遇如要盟一朝勢奪德未改萬鈞已與毫釐輕
畏威諛上亦隨毀矧復鼓舌加其評逶迤陰拱質氣厚
兩豆塞耳心無營嗚呼古人不可見今人可見誰與明
章章節義尹師魯飭躬佩道為華榮希文被罪激人怒
君獨欣慕如平生抗書數下自論劾惟善與惡宜彙征

削官竄逐雖適楚一語不挂離騷經當年亦有大臣逐
朋邪隱縮無主名希文果若事姦險何此吉士同其聲
高譚本欲悟人主豈獨區區交友情

右尹師魯

先民至論推天常補袞扶世為儒方園冠博帶不知本
樗櫟安可施青黃帝圖日盛人世出今吾永叔誠有望
處心學士貴適用異端莫得窺其牆子年五月范京兆
服天子命臨鄱陽二賢拜疏贖其罪勢若止沸反揚湯

勅令百執無越位諫垣何以敢封囊哀來激憤抑復奮
強食不得下喉吭位卑無路自聞達目視雲闕高蒼茫
裁書數幅責司諫落筆駸驤騰康莊刃迎縷析解統要
其間大意可得詳書曰希文有本末學通古今氣果剛
始自理官來祕閣不五六歲為天章上心倚若左右手
日備顧問鄰清光苟爾希文實邪佞曷不開口論否臧
陰觀被譴始醜詆摧枯拉腐奚為彊僮曰希文實賢士
因言被責庸何傷漢殺王章與長倩當時豈曰誅賢良

惟時諫官亦結舌不曰可諫曰罪當遂今百世覽前史
往往心憤涕泗滂斯言感切固已至讀者不得令激昂
豈圖反我為怨府袖書乞憐天子傍謫官一邑固分耳
恨不剖腹呈琳琅我嗟時輩識君淺但推藻翰高文場
斯人滿腹有儒術使之得地能施張皇家太平幾百載
正當鑑古脩紀綱賢才進用忠言錄祖述聖德垂無疆

右歐陽永叔

人稟天地中和生氣之正者為誠明誠明所鍾皆賢傑

從容中道無歎傾嘉謀謹論范京兆激姦糾繆揚王庭
積羽沈舟毀銷骨正人無徒姦者朋主知膠固未遐棄
兩轡五馬猶專城歐陽祕閣官職卑欲雪忠良無路岐
累幅長書快幽憤一責司諫心無疑人謂高君如撻市
出見縉紳無面皮高君攜書奏天子遊言容色仍怡怡
反謂范文謀疎闊投彼南方誠為宜永叔忤意竄西蜀
不免一中讒人機汲黯嘗糾公孫詐弘於上前多謝之
上待公孫禮益厚當時史官猶刺譏司諫不能自引咎

復將已過揚當時四公稱賢爾不肖讒言易入天難欺
朝家若有觀風使此語請與風人詩

右高若訥

和王勝之遊普明院

昔賢履道第平時洛都選門外多風塵林端出臺殿名
園迤邐清小徑縈紆轉脩竹環數畝可愛清不變冰生
流水靜葉盡危巢見晴日破雲來遊魚過池面君意高
如鴻孤超遺健羨茲遊恐難屢歷覽豈云倦放懷窮幽

趣回首抱歸戀裁詩賦景物芬葩有餘綯呼童秣子馬
追閒性所便

陪諸君會史館園

名園霽宿雨春日正和柔花香泛草際竹影搖清流鳴禽
自往還遊魚時沈浮出門市朝喧愛此林亭幽況陪君子
讌飛觴更相酬亦有佳人攜豔歌青眉愁佳人足娛適遠
思何夷猶故鄉去千里野堂臨溪頭夢寐別四載南望無
時休王粲昔從軍登樓以銷憂今予豈不然

每到終遲留

過白樂天墳

樂天本才士羽儀初頡頏脫身避禍機遂得林泉尚生
愛香山遊死亦香山葬悠悠醉吟魂終古填幽壙小堂
松檜間躋攀白雲上春日照伊流素波明演漾草樹豈
有情一步一回望

楊叔武北堂夜話

歲晏物景薄層陰向晚饒輕雲隱微月殘雪棲枯條夫

君有高適顧我慰寂寥
瀟灑開北堂拂榻延良宵
前几陳古書坐見千載遙
間亦發新句幽思含九韶
神明靜外照念慮醉中消
揚雄戒丹轂顏子安一瓢
良玉不火變翠栢寧霜彫
此心固獨往聲利詎得招
罍灰寒更劃燈炮落仍挑
相看數漏板後會誠重要

送胡武平出守吳興

東南有佳士文高志清苦
翩然請郡章入居使君府
雲水生春瀾瑩淨沙可數
霽日明旌旗長風送鏡鼓
煙帆

十丈船湖山一抔土橘嫩宴亭秋茶香齋閣午神歡所
適宜動默造幽覩應念懷鉛人垂頭證魚魯

永叔示及聖俞酬答因奉和寄聖俞

吾友多稱君思見寒附火氣溫玉開籍才敏鏃加筭嘗
於師魯書言詞屢及我乖疎久益新慕合迎已可奈何
縻組綬無路動車輶近乃得百篇能詩今信果清寒水
石春怪險蛟螭鎖遠念煙鴻去呈妍露葩娜古人雖已
矣風流未應墮東來勿後期山桃綴紅顆

送安思正之蜀

臨字思正

賤者易屈志少年多直情子獨脩節行愛護如目精辛
勤走銓省歷歲纔點名舍居在窮巷門戶面西城妻孥
愁屢空獨爾心無營驅騾從僮僕間或造予庭是時楊
叔武相值極驩誠妙言發潛穉速意倍幽萌羞諛刺俗
子指急條邊兵過從豈云厭時節忽崢嶸叔武守岳陽
別去方行子今復之蜀蜀道天險并橐中無一錢劔
外幾百程春風卷地來凡草猶奮榮如何使之人憔悴

氣與形內富在乎我外窮繫於生此事久已判努力敦誠明吾友黃君度實乃浮其聲子往從之遊切磨固相

成

城字
君度

寄襄城孫主簿

昔子尚穉孩從親來此邑今子稽簿書職守仍前襲

其父

嘗為縣
主簿

歲月曾未幾風流正相及新硯刃益銛舊署墨

猶溼非徒吏氣奮固使家聲立征調事漸繁須材時所急何不一軒翔榮名亦可拾勗子乃自省滿顏抱羞澁

送任山歸河東

風俗憂思深在昔言汾絳之人隱其間白首甘陋巷畢
力事詩書豈特專記誦編年作通記起周迄炎宋甲子
二十五迴環補遺空子聞春秋法尊王正一統維持生
民綱樹立大邦棟上賢若游夏鳥獸於麟鳳三傳自名
家講解或失中區區休預徒奔馳困羈控排闥侵異端
寢久成蠹蟲仲淹著元經劉蕡比奴從去聖日彌遠斯
言誰折衷猶勝兒女曹煙雲費嘲弄君於春秋學勤勞

務包綜向時恥飛箱畫策尚禽縱羌戎負恩德王師歷
秦雍邊圉重瘡痍堪為賈生慟廟堂誅賊謀謂與天下
共詔書入巖穴丐告嘉謀貢使者出河東輒以姓名送
謁來遊京邑天門如可壯岑巖雙浮雲下有千人禪扳
緣逐聲利激射苟祿俸踴躍不敢前撫心愈疑恐短翮
無吹噓微芳少培植擁客舍逼隆冬蕭條殘雪凍悠悠晉
溪上水石挂清夢長謠復西歸孤懷不偶衆身窮見節
義物曲何時用美田隨意耕寒魚傲經種夜堂素琴橫

晚案青蔬供決然顧予別蕪音強吟諷持歸傳里閭亦足侑饔飧

姑胥行

香涇無故流胥臺有餘基太伯以德啓後王結心師夫
差昔好戰戈矛臨越陞天蟹須食稻未拯吳人饑于今
十一貢貧甚吳王時全吳古都會腴田溉湖陂雨暘適
小變數米不足炊吾知事本末本末何由知家戶徼福
利坐輸黃衣兒平糴連拖漕入朶天兵頤困窮不夕儲

勢若偷生為長慮且後顧荀卿有良規

泊吳江寄胡武平

遙夜吳江瀕露坐鬚成葆天空不帶雲野迥正收潦徘徊波上月灩漾浮光好清風送炎歊覺秋氣早乃問苔溪路舟虞為予道水行至州下樓臺壓煙島淨居譬如仙嘉產極富媪念君鎮雅俗適以資恬浩豈不欲一往驩誠寄鳧藻縱遊窮佳賞劇論寫幽抱嗟予遠庭闈六年見春草終日諷陔蘭無路羞羊棗胡為久去家一

金史四庫全書
卷一
慮心如擣今而賜告歸計課免讎討前之奉慈顏敢憚
勤興阜北來尚何時汀洲白蘋老儻得杯酒同為君一
醉倒

遷陽道中奉寄楊正臣同年

并序

襄頓首頃年同年祕校楊兄以疾去官退休于家洗
洋自適無不如意每念不得一奉從遊之後以觀塵
外之趣如何也前歲復往邑中未始一通問訊懷恨
無量今者賜告迎親歲暮道遠歸心搖搖又不得一

造門下顧塵容之人益可愧耳過遷陽路輒書一篇
以尊企念之思兼伸起居十二月二十八日襄頓首
名第同一籍家園連七閩何為別眉宇於今十四春昔
子補一尉扶病走風塵歸來解組紱宴處願精神架書
括遺逸甕酌涵清醇東阡與北陌侯問通慙慙或言疾
良瘉呼盧氣益振或傳近詩句平淡與古鄰語之天下
事塞耳不復聞寧當決引去道固有屈伸嗟予仰尺祿
對讎中祕文天子誤采拔指名填諍臣力微責任重百

慮加一身列章乞便郡賜告迎慈親窮冬過梨嶺山蹊
出幽榛俯深下坎井斗起攀蒼旻水石蓄晚沙霜風變
朝皴粲粲澗中花孤芳能自珍班班雲上鳥朝鳴亦求
羣歲晏時節動天遙客愁新去子無跬步笑語絕燕秦
作此欲招隱翻愧林泉人

碧峯亭

虛亭城西隅開檻俯臨北青山正相向萬狀呈峭格落
日涵紫翠深春變顏色雲石抱幽致猿鳥自娛適上窮

林端寺下見海內國賢侯乘閒來四座揖佳客歌吹有
杯酌筆研角文墨雄談連今古大笑一歡戚嗟物亦時
過曠久茲乃得從知閩州圖復記新名迹

端明集卷一

欽定四庫全書

瑞明集卷二

宋 蔡襄 撰

古詩

憶弟 有序

丙子年春三月予解官漳州與弟君山西行至順昌
富屯之間夾溪十里紅白薔薇盛開時與君山臨流
飲而賦詩甲申夏四月二十日復來追悼君山之亡

留詩屋梁以紓哀思

清溪曲曲抱山斜，遠溪十里蓄薇花。
春風吹香襲人骨，乾紅淡白相交加。
眼睛眩晃不能視，爛如赤日凌朝霞。
時有扁舟向中下，共疑來處從仙家。
于時邀我臨流飲，下踞大石盤犬牙。
平生意氣一快論，屈指世務還驚嗟。
酒酣襍紙探強韻，胡塗醉字成亂鴉。
侵更把火入官舍，下馬猶吟詩各誇。
何言花落悲人世，只見溪流度歲華。
今年初夏我復至，深叢晚艷餘孤葩。
山川故物依然在。

惟子別路幽明賒想象音容杳何許
桂旗獵獵隨雲車
悲來獨坐蔭芳樹涕淚揮灑霑黃沙
行人恠我愛溪水
那知此恨無邊涯

道中寄福州王祠部

臨津館下日銜西風卷寒潮上碧溪
畫船急槳隨潮去
山川滿眼烟淒迷醉起開船看潮落
林深日落哀猿啼
離魂復與潮東下兀然愁坐心酸悽
今年賜告歸鄉里
翩翩飛鳥投故棲雙親素髮喜我至
鞠撫歡笑如嬰兒

東阡北陌來慶問嫗翁壘駭交持攜雖欲晨昏在環堵
奈何職守通金閨春暮辭家就行役幽蘭在手空萋萋
閩州太守意慷慨一見歡甚無町畦欲令邦人滿瞻聽
灑酒高會撾鼓輦我知君侯落落者胸中氣象盤虹霓
問之當今至急務無若羌虜方突梯君言區處果得術
勢類秋隼持寒雞養兵精悍不在衆黠賊頭顱可立提
海隅僻郡誰與語強欲論列懲吹壺又言人生尚忠孝
二者輕重均銖圭以諫名官宜盡節健行勿繫驂騑蹄

別來破熱走山驛神疲骨瘦顏容煎作詩遙寄復感激
豈不戚戚論乖睽

龜山夜泊書事

十月淮水平瑩淨鋪寒簾浴日弄淨光涵山碎青點開
帆直千里快去曾非漸盲風斗作勢怒浪立呈險枯林
助呼嗥巨蜃工騰閃假崖少休息繫纜猶歌颺忠信古
云伏奸邪神所貶扣心良自安潛祈亦羞諂夜分羣籟
息天明惡雲斂霜威寒更清霽色鮮可染懷安固俗喜

乘危豈予歎賜告雖慶幸被恩實慚忝慈親慰衰髮嬌
兒別啼臉人情足愛戀將思輒閉掩世事忽憂來驚起
類癡魔金絮北餌胡弓刀西歷陝天子欲求理羣材務
搜檢大明破昏翳久弊刮痕玷有如廣廈時拙者亦磨
剡行路勿遲遲流年空冉冉

送楊渥赴西安主簿

余思去夏還甌閩溫風赤日爭陶蒸舟行夜寄浙江棧
江濤洶湧來相仍雷電翕飈蛟螭騰方牀竹簟寒生冰

上隴西去景色澄青山兩向水一絙猿鳥啼叫交酬應
晚樵出霧魚投罾脫離滓濁躋陵兢造託微波訊嚴陵
清遐可使貪者懲山窮水盡乃攀登爛柯巖岫孤峻嶒
幽邃闕矚崖險憑少留觀愛喜莫勝子官其間良足稱
子材又美神粹凝萬象態度遭披凌吟咏設寫踰畫繒
當有味者論淄渾今予癡仕如秋蠅飛塵滿耳汗浹膚
聞子大編行可乘骨目森疎神慮興子姑去嗟予未能
送子一念魂九升

贈勤師

勤為浮屠人形類心不偶獨負山林棲遠犯風塵走如
聞大衆居乃是賢豪藪專意學文章韓編不離手退之
所尚者豈以言深厚徑馳周孔域不為雜說誘大凡民
之生蟲豸均一醜聖人酌中道君臣與夫婦飲食若衣
冠事行而易守不喜釋老言詆斥遭誣負子今讀其書
無乃相紛糾學本勿學末何為恤衆口

和黃介夫憶竹

君家有美竹繞廬千百個種時意慮深別後年華過顏
色日益新根本久已播石間鳴溜去烟外哀禽和子特
何依因茲焉辜嘯卧慈親齒髮暮學宦非敢情風雲乖
會遇羽翼頓摧挫遺經極精究收功若計課懷策遊鉅
公鯁語幾喙唾忍腹大窮歸離魂費招些子嘗欲論薦
身微蟻在磨藉令或指摘聲名屢自墮吾師天下賢黠
羌久未破屈禮致豪英雋材多將佐古來死思士乃是
翳桑餓况子挾所能何門不驚坐丈夫感氣義豈肯類

市貨行矣勿棲遲曷曰祖車軼憶竹夙有尚直節無染
浣勉哉困益堅持之以為賀

李山英以疾歸田客有言山英移書石守道者
因撫取其略作詩以送之

吾友守道氣剛勁醜邪扶直出天性意高身賤無所發
胷中事事先後併襄嘗畏其大勇果願以中直為得正
忽聞魯士李山英移書告之要力行曰今天下最急務
邊頭戰守羌夷橫異術紛回蠹化原佞夫欺巧疵邦政

生民失職餽斂繁勢若久旱方雩禱安得快雨洗長空
萬物蕭森蒙大慶古人有以身徇言前者已僵後者更
況值朝廷上寬大苦諫兼容天子聖我疾不幸子可屬
或列封章或庭諍勿學得路世俗兒軟語妖歌日酣鶯
乃知山英落落者支革雖疲心愈競子思物理似顛倒
難用智愚准衰盛賢豪既少遇又稀或老且困壯而病
就令貴顯亦迭躋无觸陰機石臨甯一思九嘆起呼天
何等官曹司是柄由來宰主都冥冥用捨惟時窮達命

山英歸去亦何恨門外無塵春色淨回看名宦似浮漚
都把雄心付觴詠

送許寺丞知古田縣

大雪擁都門子行亦良苦予貧乏觴豆子車誰為祖少
止聽我言於子不無補于今方用兵連年戍羌虜戰死
動萬計募人填卒伍賜衣縻國帑走粟填邊庾平時賦
稅外弓刀甲楯弩千名應急須筋皮角毛羽前年科輦
革農牛半斤斧殺之先冒禁不殺即鞭楚江南供鵬翎

是物不棲渚十倍買所無贏利資商賈編紙作戰錙紉
聯驅婦女輸來不適用空屋窠蟲鼠此類如蝟毛更僕
難悉數大凡斂貨財百姓若外府苟可入軍須豈敢怨
官取蓋患在不均又索非其土有司失預計臨事纔披
簿嚴程弗渝日落符灑飛雨使者但依違州家不敢主
況復為邑令喑吟莫伸吐其間或得才吏手無容舞子
今佩縣章所領十萬戶志慮固精明利病前可覩姑能
務均一瘵瘼庶蘇瘡

遊鼓山靈源洞

郡樓瞻東方嵐光瑩人目乘舟逐早潮十里登南麓雲
深翳前路樹暗迷幽谷朝雞亂木魚晏日明金屋靈泉
注石竇清吹出篴竹飛毫劃峭壁勢力勿驚觸題名石壁捫
蘿躋上峰大空延眺矚孤青浮海山長白掛天瀑汎逢
肥遯人性尚自幽獨西景復向城淹留未云足

新作春野亭

太守職民治詔書劬吾農載酒事緬邀作室當廨中況

憑軒牖高中視田野功澹淹沐新澤依微生柔風江湖
漲新綠山麓延朝紅耕鉏時節動歌謠聲意通慙非共
理材幸遘頻年豐未厭畎畝樂駕言誰相從

春野亭待月有懷

浙瀝涼風來空郊生暮寒山氣鬱蒼蒼江流去漫漫闔
關行人稀投棲夕鳥還疎鐘度林際華月吐城端徘徊
待遙夜露下明河寬心朋隔萬里獨坐起憂歎

送柯祕書三子歸泉應詔

祕書昔共官臨漳時呼三子侍側傍脩瞳閣額善應對
舉措不類羣兒行遙知成就在他日爾時迄今十載強
閩州太守無伎術乞持符竹還故鄉近觀詔書下郡國
選訪行實登俊良巍然三子復過我衣裾飄灑凝秋霜
各攜編軸幾百幅互以理要充詞章久之潛思叩幽眇
角牙騰觸聲礪礪言歸溫陵入場屋爭奮筆舌論短長
海鷹上雲出爪翼天馬歷地無羈韁祕書多才晚未遇
有如此子傳義方吾徒沉昇不須議且看少者騰聲光

州學餞送解發進士

坐中分
得意字

朝家歲取天下士官守小大悉分治育材論薦苟失宜
德業英豪苦難致予嘗備員內供奉作書叅議科場事
鄉舉察廉未易復責其節行在長吏策之當世之大務
適時可以觀周智問之六經之歸趣知言可以見精意
衆賢一畫天子可開設學校朔南被世儒苟欲便有司
詔令初傳尋已置今年郡國選多士糊名仍舊按瑕類
常憂璣貝隨手遺往往中夜起不寐折封辨號指姓名

十九冥合州人議耽耽黷舍秋景長芳穀旨酒邀賓醉
惜哉今樂與古異遣士禮數不能備霜天寥寥萬象清
健風開送羣飛翅大明帝居一氣傍春日照耀桐槐翠
勉思奇策當天心厚祿榮名時所貴時之所貴亦外物
君子存誠思遠至

寄題滁州豐樂亭

君為滁上守乘閒務幽尋羣從留山阿美望窮前林良
醺追佳賞高亭曠遐臨煙雲無定姿水石唯清音靜見

魚鳥適遙聞雞犬深時節屢豐有民里無欺侵豈獨延
衆物因茲託冲襟大筆每絕唱芳樽寧孤斟別日念已
長來期詎能今安得凌風翰相從殫歲陰

達觀亭

峭峻釣龍石飛亭壓其端曠徹四無際因之名達觀扳
雲躋大庭仙路何紆盤秋明澄遠綠晚霽凝新寒城郭
烟火稠水陸漁樵安偶暇按民俗適遊心意歡鳴絃俯
清流對酒環蒼山重拂衣裾淨從帶夕嵐還

聖泉

場十餘年今者復
溢俗傳燠則民安

源流出何山湧涸茲有異湛然盈不泓餘波下金地清
甘本無滓渴飲得真味端能發茶色博亦資農利矧茲
民俗安湔湔尤可意滿酌復攜歸良追曲肱意

聖泉寺松徑

徑中草
不植

青松冉冉門前道根底堅牢顏色好鳴籟蕭森風雨生
紫鱗開動龍蛇老天若有意別留種百年其下無纖草
雷霆遶遶雪霜重勁節支扶不顛倒野安峭拔已背時

肯要藤花彊纏抱南方赤夏苦蒸濕萬木無聲就僵槁
忽經密蔭少休息肌骨便驚秋氣早寄言匠者勿復顧
留作清涼除熱惱

釣龍臺

龍在固神物動與風雲會胡為脫淵泉輒觸鉤綸害無
乃護明珠睡目方曹昧而或嗅香餌貪涎適霑濡不爾
騰角牙自銜鱗蟲最來應山嶽搖去等蟬蛻傳聞曠
百世茲事久掩曖空餘古臺石碑矼塵沙外湍流卷白

日巖壑動清籟乾坤終蒼茫物理有否泰

授轉運使罷州端居述懷

被詔領均漕前解閩州符掩闕謝來賓釋然捨擘拘日
晏眠空齋啼禽在高梧神情已欣快病恙還輕蘇雙閒
固自適况與塵滓殊勿樂夸毗子開眼趨畏途投身試
羅網反用腴妻孥精慮成長謠鑒此非迷愚

移居轉運宇別小欄花木

三年對小欄花蕊見顏色紅薇開已久春風長先得素

馨出南海萬里來商舶團團未利叢鱗香暑中折餘畦
十數種亦自尚風格念爾幽芳性乞致多手植瑤草固
微生栽培子豈德別去重來看猶使中情惻

北苑十詠

出東門向北苑路

曉行東城隅光華著諸物溪漲浪花生山晴鳥聲出稍
稍見人烟川原正蒼鬱

北苑

蒼山走千里斗落分兩臂靈泉出地清嘉卉得天味入
門脫世氛官曹真傲吏

茶壘

造化曾無私亦有意所加夜雨作春力朝雲護日華千
萬碧玉枝戢戢抽靈芽

採茶

春衫逐紅旗散入青林下陰崖喜先至新苗漸盈把竟
攜筠籠歸更帶山雲寫

造茶

其年改造新茶十斤尤極精好
被旨號為上品龍茶仍歲貢之

屑玉寸陰間搏金新範裏

龍鳳茶八片為一斤上品龍茶每斤二十八片

規呈

月正圓勢動龍初起焙出香色全爭誇火候是

試茶

兔毫紫甌新蟹眼青泉煮雪凍作成花雲閒未垂縷願
爾池中波去作人間雨

御井

井常封
鑰甚嚴

山好水亦瑯清切甘如醴朱幹音幹待方空玉壁見深底

勿為先渴憂嚴局有時啓

龍塘

泉水循除明中坻龍矯首振足化仙陂
回晴窺畫牖應當歲時旱噓吸雲雷走

鳳池

靈禽不世下刻像成羽翼但類醴泉飲
豈復高梧息似有飛鳴心六合定何適

脩貢亭

予自採掇時
八山至貢畢

清晨挂朝衣盥手署新茗騰蚪守金鑰疾騎穿雲嶺脩
貢貴謹嚴作詩論遠永

題譙國評事壁

長岡隆雄來北邊勢到合下方回旋三世白士猶醉眠
山翁作善天應憐如彼發源今流泉子孫何數鷹馬然
有起家者出其間願翁壽考無窮年

遊冲虛觀

按圖經黃霸
昇仙之地

真人玉骨輕御氣升瑤臺俯首視下方萬落腥塵埃香

火久寂寞山川空徘徊舊樹絡青蔓虛壇生紫苔宴坐
白晝永長吟清風來飛花亂棋子游蜂依酒盃嘉月當
醉飲上客誠珍才神仙那可異金鼎何時開

題延平閣

雙溪會一流新構橫鮮赭浮居紫霄端卧影澄川下峽
深風力豪石峭湍聲瀉古劍成蟄龍商帆來陣馬晴光
轉羣山翠色著萬瓦汀洲生芳草樹自閒治主郡王
士安高文勇故賈顧我久踈悴霜髭漸盈把臨津張廣

筵窮畫傳清竿舞鼉驚浪翻歌扇嬌雲惹歡餘適晚霽
望外迷空野曾是勸遊人意慮亦瀟灑

送勤上人歸吳中

吳江水好吳岫靈吳人哲白神氣清當須比屋皆佳器
奈何儻有名公卿究觀是事見藏伏例學浮圖超死生
遂令才智蓄利澤若曰不下霑四瀛勤師內外久著力
文字骨節初老成十年棲遲輦轂下淵然澹薄無經營
惜哉明了足見解獨擘迅翮翻青冥殘秋忽別東南去

塵土擺落衣裾輕西湖勝處拂談席綠波畫舫吾其行

送石昌言知宿州

符離封城古云望扼控東南地形壯飛流金粟走舟車
鎮壓奸雄宿兵仗昌言才思老臺閣聲名遠出風騷將
倦直承明得守符詔書遣臨士民上萬家裁製須得宜
譬若楸楠迎大匠京師從遊日月久送君酒酣益惆悵
人生豈効雞鶩羣意在糠梁取甘養邊隅多故方急材
往往稠人拔公相吾儕有策空自奇皎皎丹衷亦誰亮

欲隨戎馬僅勝衣強作文章還覆醬大都用置繫於時
丈夫未死固難量觥巡卷到君勿辭行看岸下船頭放
我今聯束若愁鷹注目青雲思遠颺一麾當復泛隋渠
願君加數為公釀

觀宋中道家藏書畫

宣獻業文學嘗作調羹鹽藏書百千帙傳世惟清廉東
堂得春和花卉晨露霑之君延賓從當畫褰珠簾朱玉
青錦囊寶軸紅牙籤大令至歐褚屈玉聯鈞鈐草行戰

騎合楷正中軍嚴水墨固昏淡骨氣猶深潛江田亦名
手農野興鉏鋤桑麻婦女喜饁餉兒童覘列女自幽閒
明眸咽頸纖昔人何遙遙意會相披瞻南曹古貌醒博
士新詩炎持杯屢屬我謂我毫錐銛煤嫗浮醉鈿研流
泣秋蟾放灑雲雷起取餘風浪恬鄙藝豈足多詫語誰
能兼因思左宣獻載檄陪車幘辱公知遇厚表裏曾無
嫌間復請筆法指病如投砭今朝觀故物惜已悲慚兼
層丘思德重素髮年華添不能枉尺尋況乃事飛箱壯

心久已衰奇尚顧未厭幸公有令子辭源橫江滿劇飲
以自慰後慶其人占



端明集卷二

欽定四庫全書

集部

端明集卷八

三至

詳校官庶吉士臣朱理

檢討臣何思鈞覆勘

總校官進士臣朱鈴

校對官中書臣劉圖南

謄錄監生臣周元濬

欽定四庫全書

端明集卷三

宋 蔡襄 撰

古詩

西齋秋暑

齋居一室靜
晝永來風微
仙棋覆前局
女布便輕衣
向人顏色強
與世心事違
且效金門隱
詎有田園歸

胡鴈

胡鴈畏空漠羣飛嚮洲渚
塞雲避射弋萬里聲悲苦
月色滿關河欲下迷處所
春江沙平淨魚蚌不可數
飽煖身肥腴歸路欲遠舉
尋常弓箭兒仰視隨意取
從來遠禍心狼藉失舊侶
小哉銜蘆智豈識保身語

即惠山煮茶

此泉何以珍適與真茶遇
在物兩稱絕於予獨得趣
鮮香筋下雲甘滑杯中露
當能變俗骨豈特消塵慮
晝靜清風生飄蕭入庭樹
中含古人意來者庶冥悟

題周著作萃賢亭

君家作虛亭獨得江山清
四向各有適萬趣合自呈
夜深蟲鳥息漸聞泉石鳴
日高烟靄去始見峯巒生
之人務佳尚意與賢豪傾
中盤淪薇蕨傍砌顛瓶罌
毫端潛造物局上暗投兵
樂遊時景邁薄宦身事縈
種花行老色馴猿無故情
蕭散復後期外塵殊可輕

周君善
詩與棋

瞻禮開師真像

輕瀾還故潯陸軫無遺音
好在池邊竹猶存虛直心
往

復二十年每見唯清嗟覺性既自如世味隨浮沈琅琅
白雲姿悵望空山岑豈不悟至理悲來難可任

偶作

作墨本誰氏研摩有強弱摩盡不見墨此處原非著

至和雜書五首

八月一日

淮天過盡入吳渠蘭亭晚日光疎疎金桃傳粉好顏色
綠醺泛灩深車渠觥巡屢卷明星出花翹零落隨衣裾

么絃不動凝古意春容淺破長眉舒庭院簾帷一齊下
紅蠟陰沈霜滿瓦雞頭軟熟七月終舉手分傳玉盈把
席前碧甕覆瑤漿一秋愁淚風前灑雲中寶暈萬重高
付與輕綃藏冰麝孤城寒柝夜迢迢誰道劉郎有天馬
歸來却問東海桑海浪漫漫彩虹挂紅絲紫脰曉刀鳴
雙龍笑斷夢中驚莫將團扇掩塵匣曾障清歌十數聲

八月二日

濃雲瞥過雙鳳飛清顏照射朝日輝畫船南畔烟成陣

鮮荷掩護仙銖衣凝魂杳眇不知處酒醺香破驚新知
一聲人耳醉人骨天容牢落星點稀海山萬里風濤外
扶桑未老成春絲春絲不斷縈成結玉環宛轉無窮時
曉簾半上香飄穗笑指冰壺凝遠淚秦樓後夜鎖孤鸞
秋風不動烏龍睡願將瓊樹隔花看一一花房暗相值
濁水芙蓉天際雲長時倚望清江濱迎來未語送歸速
暮山紫翠空含嚔勸君美酒千萬壽情如芳草年年新

八月九日

曉虹跨江一千尺平浪東西入天碧遊人初覺秋氣涼
衣不禁風薄羅窄漁家小艇方醉眠艇裏長魚三尺白
彩欄北倚數流螢似與流螢舊相識香脂揩盡暗成雲
銀甲試絃初未直橋前流水聲潺潺年華一去何時還
重來若問桃花路記取松亭月影間

八月十二日

高樓中天月色淨玉山禾熟秋雲映草邊水際見流螢
流螢獨自尋香徑稜層鴈塔挂千燈密意雖通語還併

城上驚烏飛復啼
落泊無依終不定
欲下長橋夜漏深
燭臺飄地青梧陰
仙人若也乘鸞去
彩霧千重何處尋

八月十九日

潮頭出海卷秋風
風豪潮起蒼海空
弄潮船旗出復沒
騰身潮上爭驍雄
沙頭萬目注江水
晴雷乾電來無窮
窓外簾旌飛獵獵
新醅翠筍行坐中
欲作吳歌弄清晝
回看滿眼西陽紅
六曲屏深映雲母
珠盤縷縷青鴉茸
山移海轉有變化
生緣長短須相逢

讀樂天閒居篇

閒居篇云君看裴相國金紫光照地心苦頭盡白
纔年四十四乃知高蓋車乘者多憂畏予感其說

因抒鄙章

予年四十四髮白成哀翁非有高蓋車曷與賢者同嗟
予出寒遠家世嘗力農十九登科第聖恩叅英雄十年
出吏選校書蓬階中

是年二十九

天子設採拔謂有諫諍風

既叨言責地

三十

蹇蹇思匪躬竊不自度量語剡奸邪

胃一毫抗千鈞擯落無流蹤同時皆驤首金紫班著崇
唯予守長樂幸就祿養豐三十四八年江海外再上螭階

東四十八西閣宿仇司化工蒙錦投機竅唯賴天聰聰
代言遊禁密侍從多從容尋行京兆事擊斷露銛鋒是
職非所好輒以死竭忠願闢大幽都為君囚四凶願拂
西省堂為君延夔龍願舒泰山雲甘澤成歲功願回太
清日晴景破陰蒙願躋萬人壽天扎終不逢願令編戶
富食衣無困窮羣臣走率職陛下居法宮文彩成禮樂

籌略羈夷戎意言亦良苦精神庶潛通短少趨遠道心
健力不充早衰鬢已華憂傷乃自攻我知古人心生德
貫上穹何為論貴賤貴畏非大公南歸雖云樂此念殊
忡忡

元日過浦城西陽嶺

逝者東流水情知無却迴遲留曾到處嗟古不同來誰
道新年好風物忍將淚眼向春開

題將軍崑

赤日正停午解衣巖石下石泉殊甘涼野籟亦瀟灑驚
猿度嶺雲遺果墜庭瓦披軒忽永歎幽抱不可寫

安靜堂書事

勿學異世人過常不可深勿學慢世人側身隨浮沈白
日當中天難破是非心不有拔俗器安得太古音大暑
苦煩濁清泉流高岑烈士無戀嫪至理須推尋

丙申秋八月過漁溪驛驛舊有梅數株嘗題詩
記今無有也二首

曾把早梅枝思君在別離別離雖云遠萬里有還期樹
枯根已撥人去復何之故館動秋色雲物藏寒曦清
香不可聞衰草空繁滋一夜平堦雨輾轉良自知

梅花不復見況乃扳花人花飛別故樹粉黛化為塵秋
風捲落葉蟲豸鳴悲辛昏鴉投舊巢匹侶自相親缺月
行復滿歸雲本無垠因題憶花篇此意難重陳

答葛公綽求猿

子求穉猿書至閩我詵猿意持贈君吾州四面列巖嶽

鉅木輳葛凌氛氲結窠栽檻走疾置十日可置澄江濱
嗟憐庶品各有性拘憂適喜無見聞彼猿之類宅丘壑
愛戀深厚編前文戲禽雖傳古仙者射臂未許今將軍
朝棲喬木之蒼莽夕飲幽澗之潺湲山空月明一長嘯
商船海上迎風聞君家東園豈不美檜竹翠密蘭葭薰
斯猿僮憶故時侶舉首斷隔千重雲縱之不遣乃得所
推夫此理惠澤零令吾郡邑決籠桺蹄者奔逸羽者盼
因觀微物通萬化譬諸獻鵠良有云

秋夜書解中壁

遙夜不能寢值茲節物清
大空瑩虛碧仰觀澄性情
素月若可把浮雲何故生
瑤琴且勿弄誰憐希代聲

秋思

幽蘭受新霜孤雁叫落月
沈憂何由平永久不可徹
將琴鼓憶憐曲聲聲急弦屢絕
芳華日益遠香澤物已歇
秋風吹石門思君還復訣
誰云無生忍識此悠悠別

寒食梨花小飲

江南寒薄春常早花卉入春先自老嗟予衰病不及時
出見池園半青草縱有餘葩在葉間行看落片隨風掃
尋春已過索寞歸重憶歡娛耿懷抱雖然妖艷難再得
但只逢花須醉倒二月中央寒食朝牆隈忽見梨花飄
開門四顧粲然白傳催翠帝賓朋招長吟環遶不知數
漸值明月臨清霄誰翦輕雲成碎蕊天留密雪封枯條
重重盡挂珠纓絡簌簌初呈箇步搖傍花行酒發新唱
滿座倒舉黃金瓢西都姚黃高一尺揚州寶髻分雙翹

幽香絕艷信尤物設欲置之千里遙壁門寫生亦名畫
未免五彩塗蛟綃莫如此君慰人意相對一笑開無慘
古來英豪多感激坐使綠鬢朱顏雕勸君且作梨花飲
慎勿稱量別流品

雨晴早出

徂秋久不雨霑濡纔此旬新陽淨萬物太虛無一塵老
稚出曠野鋤犂及清晨愛爾安居樂力作勿辭貧

訪天台菴

幽人去未還門戶和雲閉亭午樹陰圓深冬泉響細寒
生羣鳥鳴清徹孤鶴唳寂寞傍山歸寫向滄溟際

和吳省副青梅

梅華畏高寒獨向江南發那知汴陽墅青顆摘春月持
之矜所無歸思動楚越願君侑清罇行恐新芳歇

留別舊居花檻

別意起中夕出門風吹衣側月光艷薄餘花香氣微清
尊歲相向欲去心有違殘葩勿盡放主人行亦歸

甲辰閏月初伏快雨涼風晝眠初覺庭前小欄
花木各有意氣效栢梁體

閏夏天地熱焰烘崇朝快雨隨清風晝軒夢覺開前櫳
畫欄花草意氣雄側枕遙問數異同如子微物煩化工
盍各言爾之所從繁葩富豔生朱紅川海棠枯條大蕊千

萬重絳桃修幹點綴赤日中蜀葵蠲去憂忿誰與功萱草採摘

烹煮祛煩習百合秋霜鉅竇垂如甕木瓜橫柯遠引交加叢

紅玫瑰葉抽綠劍端黃茸山薑直立開拂泉貨通金錢疊遶翠

羽翮虬龍

薛荔

誤入畦町非余公

頌

助滌渴肺思匪躬

麥門

冬物物自名詞不窮願當我意乃汝容負汝不飲慙衰

翁

過皇甫侍郎

丈人幾八十歲晚益窮經陰陽判九六天地環丙丁初
若發泉穴漸已澄滄溟所寶非世有願充天子庭問我
久京國鬢髮何星星無乃矜才能吐論生風霆不爾負
潔修揚眉自娉婷昏翳本來性憔悴百歲形子知大方

家真精潛杳冥萬化一相遇起滅如秋螢而於須臾間
計較壘與瓶膏消見遠照水燼聞餘馨唯公懇懇誨敢
怠拳拳聽追思嚮踐歷媿汗曾未停決然趨所適金刀貴
發硌去矣汴流駛薰風送揚舲

南都思杜祁公

祁公清德老在昔相先帝青雲吐論高白壁持身銳待
俗無町畦取人兼揭厲甘貧安車後直道洪鈞際每聞
天下士行業若材藝未見比調饑況乃挹襟袂早嘗登

公門顧眎叨末契謂有金石姿良工心剏礪仰瞻通德
衢獨立者英第所居名也評書草聖優煇薜雲腴細遺墨秘
巾篋感激君子惠悲風吹白楊佳城茲久秘聲名與灘
渙東流無已歲

鄮陽行

春秋書大水災患古所評去年積行潦田畝魚蛙生今
歲穀翔貴鼎飪無以烹繼亦掇原野草萊不得萌剝伐
及桑棗折發連簷甍誰家有倉囤指此為蕪井頭會復

箕斂勸率以為名壯強先轉徙羸瘠何經營天子愛元
元四郊揚使旌朝暮給饘粥軍廩闕豐盈殍亡與疫死
顛倒投官坑坑滿棄道傍腐肉犬豕爭往往互食噉欲
語心驚覓荒村但寂寥晚日多哭聲哭哀聲不續饑病
馬能哭止哭復吞聲清血暗雙目隴上麥欲黃寄命在
一熟麥熟有幾何人稀麥應足縱得新麥嘗悲哉舊親屬
我歌鄒陽行詩成寧忍讀

期秦伯鎮不至

高人懷真趣每欲棄祿仕超然外造化那復顧妻子有
田給饑寒有路出生死儻得自由身休隨榮利起或聞
亳郊滂族大無餘米且持州紱去官廩尚可捐何時當
歸來焚香朝玉几

會亭遇孫資政孫公赴闕公致仕已七年時召
歸將有西鄙之任

志節雖落落不能無謗毀壯年自雄豪末路遽顛委衆
口方叢嘈即欲置之死公嘗為大臣沈寃不辨理恭惟

仁宗聖散地而後已新治甬上居閒逸安暮齒恭惟今
天子繼照明鑒是問公何處在勉哉為予起使者臨其
門將駕不容俟滔滔汴流急行舟姑少止長堤榆柳深
夜涼襟帶襁語終求其要茲事殊可喜朝廷英俊林豈
無人器使謂公先帝臣擢任刷前恥惟公體上意畢力
荷恩紀富貴安足論清心寂如水古人老益壯忠義在
所拍況復千載遇功名邁良史

泗州登馬子山觀漕亭

廟社奠東都恃德非恃險聚兵三十萬待哺無容歎西
有砥柱峻菽麥不踰陝齊魯糧食藉灞水不澌灝唯餘
汴渠利直貫長淮隲歲輸六百萬江湖極收斂挽送入
太倉因陳失蓋奔將漕苟不登汝職茲為忝或謂取太
多六路有豐儉其間一不熟饑殍誰能掩一旦俾之粟
是人意常憚區處失其宜斯言反為玷嘗欲請增減革
孚亦須漸連營今飯稻香美若菱芡因循未易論官曹
畏書檢虛亭一臨眺比比危樯颭從來數千里歲時空

苒苒雨餘山氣淨黛色淺深染夜昏漁火出倏忽電光
閃須臾月色空水面鋪寒簾相逢喜道舊城柝屢移點
因語發長謠誰能刊琬琰

和答孫推官久病新起見過

去年大暑過京口唯予見過牛馬走氣溫貌古風骨粹
如入魏國逢軻叟前趨王事難少留兀若洪鐘未遑扣
窮秋忽聞感疾恙鬪蟻入牀揚左肘天生賢者固有待
豈得數竒而不偶勿藥之喜既和平大肉快噉飲幾斗

神明復還方寸靜萬卷舊書仍次部新年於已無職事
雖欲耕田不盈畝輕舟將覽吳中春獨信檣烏沿霞數
知子玉趾遠臨訪倒屣出迎唯恐後山堂永日接言詞
楚萍色味兩俱剖自云君命入巖幽顧此一身縈組綬
病軀未堪事刀筆野性如何屈杞柳寧甘貧薄且悔處
終歲窮經徒皓首陶家埏埴以為器其大如甕小如缶
昔人知命斯上通動靜以時隨所有我聞子論心惻惻
儻或祭天必薪樵大篇短韻時見投開霽清暢穿戶牖

強抽鄙意答長誨脂澤陋滋容益醜錢塘風物湖山好
與子相從頻載酒一水汪灣暮日浴千崑轉側朝雲嘔
放懷方外聊自適舉杯相屬起為壽美哉此樂世難得
勿話歸期論子丑

丙午二月十二日雜言

仲春一浹我生之辰紀歲之行五十有五慈親是時九
十二稱觴獻壽於膝下曾孫滿前侑以詞慈顏強飲至
酒所我今鬢髮白垂絲揮拂萊衣輒起舞願親長年無

窮已願兒強健典州府不富不貧正得宜如我奉親難
比數

和王學士水車

星鳥正中春事濃農夫入田布嘉種田中白水極瀾漫
鷺翔羣鶩魚鬣聳扶持水車倚塍畔翻翻龍脊超雙踵
日在天中人在野脫粟未逢心益恐婦姑晚餉猶德色
童稚伺餘窺饁籠夏苗欲長苦焦枯又送微波上層隴
傷哉作勞無早夜歲終贏饒凡幾桶

音角秦
斛也

豐年遺秉

尚或歎一有不登皆散冗賦田無利從來遠索息嚴於
公上奉富者不耕耕者饑役民權枋雄豪總錢塘風俗
本夸奢上商射利尤加勇丁男特壯走長街僕奴意氣
金銜驄方春遊女湖上行舉首惟愁釵插重笑汝田家
弄水車何不乘時作光寵

四月八日西湖觀民放生

盈舟載魚蝦投瀉清波際應無校人欺獨行流水惠非
求升斗活終免螻蟻制江湖自相忘洲島亦還逝脫淵

思曩戒嗅餌省非計為生豈不幸萍藻庶可翳

和王學士芍藥

粲爾芳草葉孤根當砌植違春已自分薰風猶借力艷
艷朝日光紛披照顏色持之遺佳人歲久香不息

端明集卷三

欽定四庫全書

端明集卷四

宋 蔡襄 撰

律詩

觀三聖御書應制

聖業存功德宸毫冠藝文勢開千里浪光動九天雲
法駕乘時至仙都與世分
皇心欽寶訓求治益精勤

羣玉殿賜宴 有序

臣蒙恩宣召再至龍圖閣觀書羣玉殿曲宴伏以
數千年間無此盛事臣忝職翰墨榮遇非常謹賦
拙詩一首備載本末上干聖覽無任戰越之至

治道承炎歷皇基亘萬年深仁涵海嶽至德著坤乾文
物歸元首臣鄰必巨賢蓼蕭思及下奕葉力追先昕色

方羣進臚音忽四傳衣冠紛雜遯臺殿鬱蟪蛄

嘉祐七年十二

月二十三日詔宰臣以下
龍圖天章閣觀三聖御書

寶字崇三聖瑤圖祕九天榮

河祥氣徹昭漢曉光旋磊砢珠璣在崢嶸歲月遷家聲

終卓越上意益恭虔書觀開鋪首

人幸寶文閣作飛白字召臣寮觀人賜一

軸兼賜紙筆墨各有差

宸毫落彩牋煙雲初不定鸞鳳互相鮮拜

賜兼金重珍藏尺璧全人人皆自得事事獨超先睿藻

敦風教

賜御詩一首令羣臣次韻和進

冥搜出化權來從玉山府遠過

栢梁篇迴馭臨高館

賜宴羣玉殿

推恩錫廣筵迷魂遊帝所

休應動星躔申命嚴樽俎

二十七日幸寶文閣召宰臣以下觀太宗游藝集瑞物十

三種仍賜御書宴羣玉殿宣諭太平無事令羣臣盡醉

新章被管絃千齡叨際會

曠古絕寅緣大施難論報精誠第祝延唯應歌盛美樂

石可磨鐫

上元進詩有序

臣言臣伏覩法駕特御端門宣諭臣僚上元觀燈
不為遊賞蓋與民共樂也臣職在文字恭惟德音
宣布睿旨感詩人揄揚盛美之私輒成短章上干
宸覽臣無任惶恐戰越之至

疊聳青峰寶炬森端門初晚翠華臨宸遊不為三元夜
樂事全歸萬衆心天上清光開夜色人間和氣閣春陰

要知盡作華封祝四十年來惠愛深

夢中作

年十八時入京就進士
舉過舒州相城夢中作

白玉樓臺第一天琪花風靜彩鸞眠誰人得似秦臺女
吹徹雲簫上紫煙

久寓悟空院刹行而書之

寂寂精廬切半空古原高下稻花中蓮趺披素輕雲梵
花萼雕紅細雨宮孤鶴睡迷千樹月斷蟬吟繞五更風
心縻尺組遙相謝歸馬南蹄疾似蓬

漳南十詠

龍臺

試看初日照龍臺
白玉堂高錦障開
樹色一番連雨淨
溪光幾曲抱山來
雲歸深洞天形瘦
風落前村笛弄哀
擬結青樓遍題詠
思王何吝斗量才

城東水閣

亭上芳樽惜別人
亭前斜日欲歸輪
傷心定是丹楓樹
拂面空來紫陌塵
歲月暗驚山色古
愁情長與草芽新

何時此地迴飛蓋寂寞欄干又一春

南溪

近郭溪光綠好裁雨晴波底敞樓臺陰堤佳樹千圍合
掠水輕舟一箭開驚釣寒魚拖糝去忘機閒鳥信潮迴
官餘擬欲祛塵意書遍平沙我獨來

滿月池亭

有客高懷脫世塵碧灣晴檻樂遊頻無心自合波中月
照影誰分鑑內人莎砌亂蛙爭噪雨杏梁雙燕欲留春

長年老厭趨豪末來揖孤雲作上賓

西湖

湖上山光一筍青佛宮高下裏嵩扃烟收水曲開塵匣
春送人家入畫屏竹氣更清初霽雨梅英猶細欲殘星
吳船越棹知何處柳拂長堤月滿汀

圓山廟

風雅遺芬嶽有神此山靈祀越千春彩毫佳句言猶在
翠剡新詞意未真絕頂黑林長帶雨曲崖飛磴不留塵

瘴雲收盡秋田熟
跋境看漿再拜人

陳將軍廟

曾憑水柵誓長江
報國全軀事不雙
力屈已嗟關羽死
勢孤猶笑李陵降
宿墳古劍龍腥匣
壞壁靈旗獸纒扛
神理高高人意近
楮錢祈福暗塵窓

白雲亭

雲擎輦檻翠崑巔
石老松皴不計年
舉世覺來空白日
幾人遊去上青天
醉看絕壑都無地
嘯倚清風只恐仙

花晚春殘無限意他時迴首定依然

齊雲閣

紫閣青梯壓翠岑春情秋思共登臨
雨嵐供眼橫千掌星漢垂簷直半尋
忍別朱欄真俗吏獨棲珍樹祇仙禽
當年人事多奇尚擬托巖扃息寸心

東郊

苒惹晴雲釀雨時東城無處不芳菲
斜坡草短孤麕卧平隴麥深雙雉飛
照鵬亂花驚客眼胃空輕絮點郎衣

年來意氣多羈束無復長楸帶酒歸

別宋判官

縷縷青陰拂去鞍
雨花狼籍顫春寒
年光別緒侵人鬢
莫向離亭子細看

城南春會

陰雲薄薄地無塵
清曉城南集畫輪
昨苑即時裁雪霰
潁川連夜聚星辰
山眉帖漢晴光擬
鶯舌尋風碎語真
芳草有情迷謝客
落花無處問秦人
樽前莫厭歌醒耳

世上偏饒淚滿巾
嘉意未闌繁盛減
東皇底事惜殘春
序賓亭

師律先憂寄朝家
此得人門庭環劍
佩曾瞻貫星辰今
已閒戎略疇能卜
宴申樓高休暇日
臺迥厭登春珍館
瑤甍舉璇題寶篆
新鴨欄迴鬪頸龍
壁活盤鱗夾幕寒
波顫前峰古黛皺
始知仙有路盡恐
世無塵武馭來金
虎儒簪下石麟機
分榮辱主解序去
留賓揖讓盈三魄
雌雄競一神氣橫
飛客箭歌協大夫
蘋萬古浮雲片勞

生斷梗身即時懽未已往事夢非真席久疑枯海琴么
似隔鄰釭花明雨暮甕耐壓霜晨鷓動殘絲柳鱸肥滑
線萼晴霞上丹葉熟粉護青筠賦景呵吟筆揮談密醉茵
流年祇容易嘉會可因循

望春詞

霏霏細雨勒梅黃一望春容十斷腸平蕪古柳青青遍
獨使潘郎兩鬢霜

落花

何事蒼苔數點紅曉來花片落春風可憐春色蕉花盡
今古此情無處窮

耕園驛佛桑花

溪館初寒似早春寒花相倚醉於人可憐萬木彫零盡
獨見繁枝爛熳新清艷夜霑雲表露幽香時過轍中塵
名園不肯爭顏色的的天紅野水濱

溪行

秋色已寥落清溪繞此行船移酒杯側魚得鱸刀鳴日

色浮兼動風痕滅又生從知隱者趣不獨傲榮名

淨衆院嘗荔支

霞樹珠林暑後新直疑天意別留春京華百世爭鮮貴
自是芳根着海濱

春酬王知縣賞春不與以詩見贈

仙陬翠觀盡繁英朱白相兼照眼明池浸嵐光生晚碧
鳥驚人語斷春聲談諧遽喜開懷久骯骯終慙走筆成
佳致可能陶靖節庭柯斜照獨忘情

欽定四庫全書

魏明集
卷四

喜弟及第

里閭高高祖德新魯庭詩禮孟家鄰連登桂籍青袍客
共拜萱堂白首親倚國精誠明火玉照人清節對霜筠
童襟開慧盈書館漸喜芝蘭在處春

西郊

曉蓋西郊道春光極或作涵太虛村風香晚稻溪日曝寒
魚雀噪飢鷹下山空病木踈歸期侵杪歲友思望吾廬

三月詣陳通民

振衣凌曉色霽野縱遊韁莓潤溪雲重春深山露香林

幽風更細院靜日偏長曾是天皇外相從識酒鄉

次韻翠嶠寺

攬蔓巖巖局峻交繩寶界平斜峰約雲勢乾樹起秋聲泉
檻妨望響霜樓助月明冥筌蕪洒落警句一何清

夏晚南墅

夏竹侍前檻涼襟折舊醒疊雲封日萬斜雨著虹明魚
動池開暈蟬移樹減清葭洲烟向暝鳬鷺自相迎

欽定四庫全書

魏明集
卷四

蕪陰樓上

野馬沈寒氣神禽度細風斷霞天共紫斜日樹齊紅山
口橫虛釣江隈跋遠艤解窮千里目爭奈思無窮

杪秋湖上

舊暑侵涼已分銷蕭疎丹樹見斜橋千千露竹全瀟灑
一一風蟬共寂寥菰米熟汀來客燕焚絲分水避歸橈
月魂未上東城角誰向東城與下招

和陳殿丞南州新詠

寶坊高閣遍憑欄曾是芳辰得未閒日上天容低接海
風輕湖底倒揺山夜深佛火寒星外春過人烟暗樹間
無意孤吟採幽致異時行橐斷空還

通源驛別顏茂才

躍馬東來不記時酒醒寒色入征衣垂楊官道連天去
落日郵亭別我歸

陪尹子漸申安禮宿香山寺

二月已強半尋春登石樓山光侵雨變草色到雲休歸

鳥沈窠際行人過樹頭剥苔看石碣因火認漁舟漸夜
灘聲惡憑虛屋勢浮乘閒聊自適觴詠屬吾流

正月四日

今朝纔見雪泥乾日薄雲低又作寒家山千里何時到
溪上梅花正好看

春曉

瞳瞳初日注窓明窓外鵲鶯乳燕聲東風氣味濃於酒
曉夢魔人似宿醒

晚色

晚色在何處樓高天宇低閒雲無去住歸燕自東西

過天津橋

日暖溪平冰漸銷水聲纔下內前橋山川滿眼閒宮殿
草樹迷人舊市朝每向尋春偏有意却成懷古更無聊
洛陽平昔多豪俊惆悵埋魂不可招

讀離騷經

莫怪靈均戀楚濱可能臣子外君親精心獨去珠無類

飛語潛來箭有神宋玉招魂推意遠揚雄流涕掩書頻
江邊自是修門路嗟苦先生隕此身

暮春登南門

麗譙高倚晚天霞滿目平臯盡物華千曲胡笳催鼓答
三重湘酎倩旗誇連江急雨送歸燕拂地輕風移落花
強倚欄干還自問此情何處是邊涯

和邱提刑寄湖南賈度支

何處多離感山郵霽野光清吟貫騷雅遠意屬荆湘霜

樹呈秋色風蘭生晚香使軺偏倚望摘藻寄回腸

和邱提刑聞新鴈寄賈度支

翔鴈來江渚秋容在遠空幾聲疎樹外一字斷雲中
虛館垂簷月平臯敗葉風裁詩託幽思幽思更無窮

遊龍門香山寺

彩閣縈林轉蒼崖隔水開龕明千像日波起一灘雷
綠淺春前草香餘臘後梅背人鷺鷥去將雨好風來
雲氣隨衣袂嵐光入酒杯清遊知不屢欲下更徘徊

聞福昌院春日一川花卉最盛

聞道春深多物華，遙憐春日思無涯。
烟涵樹色相依好，山擁溪流一帶斜。
休問主人先看竹，只隨漁叟便逢花。
憑誰畫得當時境，持去江南細與誇。

山前溪上最宜春，千樹夭桃一雨新。
爭得扁舟隨水去，亂花深處問秦人。

登府店福昌山閣

危磴通高閣，登臨境迥清。
雲開千岫出，雪霽一川明。
斷

雁來孤影遙，泉落細聲野。
烟依竹見溪，樹與橋平已。
助騷人思空，搖遠客情扁舟如可泛。
歷歷是江程。

雪中不見女几山

宜陽南路是仙山，雪擁雲埋杳靄間。
洗眼來看無處覓，不知可復在塵寰。

登三鄉寺閣

歷覽宜陽道，披軒臨朔風。
地疑塵世外，人盡畫圖中。
巖曲踈鐘答，村前小徑通。
水烟寒更白，山氣曉微紅。
遊宦

金史四庫全書
卷四
真浮梗流年似轉蓬長懷無所寄盡日送歸鴻

嵩陽道中

千里動秋意紫迴上古原山樵斷晚日野火着寒雲鐘磬出鄰寺牛羊下遠村振衣歸去好塵事莫知聞

訪陳處士

橋畔修簷下碧溪君家元在此橋西來時不似人間世日暖花香山鳥啼

題建造寺奉先院

日照溪山生翠光
春深花草雜幽香
登臨誰會遲留意
門外塵埃去路長

送別陳比部

祖帳西郊道川原
畫閣臨燒痕
經雨活樹色入溪深
斜日明春態孤雲感客心
何人知別意重把酒杯斟

城西金明池小飲二首

曉出都門外名園連翠屏
融怡春物動瀟灑塵慮醒
輕風送花信遠水涵空青
舊遊無處問芳樹隔重局

城西禁籞宿烟收霜薄朝寒上蜀裘佳樹得春生意動
平池受日翠光浮十年歌笑驚前世滿眼風花是舊遊
從此曲江芳物好定知重到更疑留

送張太傅還鄉

置器功成佚退身故園南望整車茵青冥直上無餘事
白首歸來有幾人門外離筵晴日曉江邊行路雜花春
橐金均散心如水平冢樹重攀淚滿巾盃酒相逢耆舊少
山川不改歲華新從公几杖何由去更祝千年比大椿

寒食樂詞

皇州令節已藏烟帝渥乘時錫廣筵和氣去添春色重
恩光來助日華鮮千聲鳳吹朱門裏一番花香穀雨前
更喜簪裳嘉宴日親逢千羽治平年

喜歐陽永叔余安道王仲儀除諫官

御筆新除三諫官士民千口盡相歡昔時流落丹心在
自古忠賢得路難好竭謀猷居帝右直須風采動朝端
人生萬事皆塵土惟是功名永遠看

送楊殿丞通判睦州

蒼崖中斷一溪來迤邐人家向水開
盡日烟雲迎旆去滿瀧鐃吹引船迴
虛齋晝夢鳴禽下別塢春遊畫角催
莫怪杜郎題處少更留佳致待清才

宿揚州

瓜洲堰埭阻行橈更等江頭後信潮
獨背殘燈數歸路風傳寒柝夜迢迢

廣陵

廣陵歸客嘆飛蓬懷古傷離向此中前世翻波那復問
十年彈指已成空樓頭畫角催殘日城上寒鴉噪晚風
井徑蕭條人不見又隨潮信度江東

馬奴周晬思之因成

馬奴今日方周晬昨夜迢迢夢到家盤裏應知心所愛
尊前唯祝壽無涯咿嚶弄語羣兒學踉蹌初行乳母誇
獨上揚州津館望江山搖落去鴻斜

聞鴈

霜風吹鴈入南雲千里征人枕上聞
欲問梁園近消息
月沈星轉五更分

江頭別杜殿丞

楊子江頭南北路木蘭船上往來人
年華袞袞東流水
世事勞勞薄宦身回首天涯成遠別
忘懷物外自相親
津亭共起憂時嘆重記津亭淚滿巾

題金山寺

畫梁詩板暗流塵水石魚龍萬句新
誰識高僧最深意

慈航長護過江人

端明集卷四